

Tiänu luosânaalij tiileest ij puáránem – luosâ rávhuiduttem iävtuttuvvoo kuálástempajan 2023

Tiänu luosânaalij tile ij puáránâm moonnâm keesi iäge luosâ kuárnummeeri lassaamist puáttee ivegin lah positiivliih meerhah. Luosânaalij hiäjus tile tiet iävtutteh Tiänun luosâpivdemkiäldu 1.6.–31.12.2023. Ciälkkámušâid haldâttâs iävtuttâsâst puáhtá adelid 31.10.2022 räi.

Tiänu čácáduv škajáluođân-, videočuávvum- já puohčâmrekinistmijn nurrum vijđes tutkâmtiäđu vuáđuđul Tiänu luosânaalijn ij lah tábáhtum puáránem moonnâm ive háárán. Näälih láá pyeremusávt siämmáá tääsist ko ive 2021, máhđuľávt joba hiäjub tääsist. Luosâpiivdon iä lah hináh; meerâst mácece luosâmeeri lii ain nuuvt uccâ, ete jyehi pivdum luosâ rikoččij kilelis kuálástem prinsiipijd.

Ko váldoo huámmášumán luosânaalij tile, te lii velttidmettum kieldid luosâpivdo ollásávt. Tááláá tiileest ij lah lamaš máhđuľáš miäruštállâđ taggaar uccâ mere kuálástem, mii ij liččii háituláš Tiänu luosânaalijd, mutâ tovâččij máhđuľâžžân sämmilii luosâpivdokulttuur hártuttem. Kuálástem já kuálástemkulttuur hártuttem Tiänust ij kuittâg nuuvâ ollásávt, ko iävtuttum rajiittâsah kyeskih tuš luosâpiivdon. Eres kyelišlaajâi uásild kuálástemnjuolgâdus nubástusâin ráđádâleh Taažâin ive 2023 aalgâbeln. Kuávžur já eres šlaajâi kuálástem fáálá máhđuľášvuođâid ärbivuáválii kuálástemtiäđu pajjeentolâmân já maadhâšmân, mutâ lii tehálâš velttid luosâ koddem tast paaldâst.

Luosâpiivdon kyeskee ráđádâlmijd láá taan ive kolgâm olášuttiđ huápulii äigitaavlust, tastko vuáimáliih rajiittâsah väätih ovdâskode kiedâvuššâm taan valjâpaajeest.

Luosâpivdokiäldu lasseen haldâttâs iävtuttâsâst iävtutteh vieresšlaajâ ruoššâluosâ kuálástem, moin ráhtádâteh ruoššâluosâ tuođânálásávt vuáimálii lassaamân puáttee ive.

iävtuttum laahâ puáđáččij vuáimán 1.5.2023. Haldâttâs iävtuttâs sehe ciälkkámušpivdem láá [eennâm- já meccituáľuministeriö nettisiiđoin](#). Ciälkkámušâid iävtuttâsâst puáhtá adelid 31.10. räi.

Tiänujuuhâ lii ohtâ maailm teháľumosijn Atlant luosâ lasanemjuuvâin. Tiänujuv čácáduvâst láá suulân 30 spesiaališum luosânäällid. Tiänujuuhâ lii Suomâ já Taažâ koskâsâš räjjjuuhâ, mon kuálástemrajiittâsâin staatah suápih jyehi ive oovtâst. Tiänu luosânaalij čuávvumtiäđuľuh kávnovej [Tiänujuv čuávvum- já tutkâmjúľávu siiđoin](#).

Lasetiäđuľuh

Vesa Ruusila, pivdotuáľuneuvos, p.0295162051, vesa.ruusila(at)gov.fi

Tapio Hakaste, ráđádâľlee virgeolmooš, p. 0295162152, tapio.hakaste(at)gov.fi